

Dakota ta honra 11 baluarte

Romeo V. Kock

Romeo a nace na Aruba 30 april 1970. Actualmente e ta casa cu Mary Carmen Garcia de Paredes y ta tata di 3 yiu muhe y un yiu homber. Romeo a sigui scol basico na Dakota, esta Fatima College. Despues el a sigui pa Colegio Arubano cu el a caba na 1988. El a bay Hulanda Rijksuniversiteit Groningen. El a caba su estudio di dokter na 1996. E no a para keto y a cuminsa cu un specialisacion pa Internista na Corsou. Acerca el a sigui un studio di Nefrologie di 2001 – 2003. Romeo awor ta traha na dr. Horacio Oduber Hospital como internista-nefroloog. Hobby di Romeo ta toca guitarra, lesa, tennis. E ta fungi como coach di t-ball. □



DAKOTA - Diasabra 7 di mei 2011 nos lo bay tin un actividad, di reconocemento di baluartenan den e bario di Dakota. En conexion cu e actividad aki BON DIA Aruba ta publica e diferente personahenan, cu lo bay wordo homenahe.

Alfonso Jimenez


Lacides Alfonso Jimenez casa cu Helena Wever Bibando den Caya Juancho Kock 16 desde 1974. Na 1948 el a bin Aruba cu e edad di apenas 4 año procedente di Colombia. Despues di su yegada y bibando na Dakota el a bay kleuterschool Sint Franciscus cu tabata situa net pa zuid di unda actualmente tin Sint Rosa School na Playa. Despues di un año el a pasa bay pa La Salle School cu awendia ta wordo yama Frere Bonifacius.



Durante e temporada cu a construi e Misa Fatima na Dakota pa Alfonso tabata un berdadero honor cu hunto cu Kamperveen, de Windt y dif. Cannegietier tabata e prome cuater misdienaanan di e misa di Dakota y e tempo ey Santo Sacrificio di Misa tabata na Latin y e misdienaanan tabata asisti pastoor pa contesta pa e parokianonan. El a termina MULO y a haya su diploma na 1962. Como cu e tabata Colombiano e no por a haya beca ni tampoco traha Na 1964 el a drenta Radio Kelkboom y eynan door di e emisora aki hopi hende rond di Aruba a conoce Alfonso Jimenez. E tabata un temporada masha bunita y hopi emocional pa Alfonso. Alfonso a join e tempo ey un di e clubnan mas popular di Aruba cu tabata Connie Francis. Pa varios año e tabata president di Connie Francis y nos a lanta den Connie Francis e comision cu a organisa Miss Teenage Aruba sigui despues pa Miss Teenage Antillas. Tambe e ta co fundado di Carnaval Hubenil Arubano y pa hopi año tabata miembro di Stichting Arubaanse Carnaval. “Nos a traha duro pero semper e team di futbol di Dakota tabata den mi curason pasobra esey tabata e icon di Dakota. Tambe algo masha peculiar di e tempo ey tabata cu e pueblo di Dakota tabata hopi uni. Bisiñanan tabata biba cu otro.” Alfonso a haya les di guitar y e ta e ta esun cu a duna Lando Garcia su prome lesnan. Alfonso ta gradici e pueblo di Dakota cu semper a apoy’e. □

Mario Steenen

Mario tawata un mucha cu a nace den e bario di Rancho. Cu 11 año Mario a bin biba den e bario di Dakota. Su hubentud completo el a pasa den Dakota. Su pasion semper tawata musica. Nunca el a bay scol di musica, pero e ta convenci cu el a nace pa ta cantante. Mario a canta den diferente banda manera Sonora del Caribe, Combo Aruba y La Revolucion Latina cu tawata banda di su colega y amigo Martin Quandus. Mario tin varios grabacion cu el a haci na Colombia. Mario ta tata di dos yiu y ta tambe welo. Actualmente Mario tin 73 año y ainda e ta traha ya cu p’e edad ta un number. Ta curason ta conta. □




Jeanne Porino Peltier

Sra. Jeanne Porino a nace un 4 juni. El a haci diferente trabou boluntario. Entre otro boluntario na Stichting Funari, boluntario na Stichting F.A.V.I. Na 1979 el a cuminsa forma parti di Grupo di Carismatica na Dakota. Desde 1983 e ta forma parti di Asistencia Social Dakota. Jeanne no a para keto y a sigui cu su trabounan pa yuda comunidad. Na 1985 el a cuminsa duna les di confirmacion. Jeanne a wordo condecora pa La Reina na 2004 pa su trabounan como boluntario den comunidad. Y na 2010 a pone riba e calendario di Baluarte. □



Evelyn Farrel

Ta un atleta multifacetico. E tin un lista largo di competencia internacional den cual el a participa representante Antia Hulandes y Aruba su isla, for di 1974. El a hunga basketball, practica atletismo y hisamento di peso loke a duna oportunidad di bishita paisnan manera Panama, Republica Dominicana, Cuba, Finlandia, Merca, Surinam, colectando masha tanto medaya, recorda y titulonnan importante. Na 1988 el a forma parti di e atletanan di delegacion di Aruba na e Weganan Olimpico di Seoul, Korea. Despues di un carera deportistico impresionante, den decada 90, Evelyn ta enfoca riba e faceta como entrenado, hues di competencia y miembro di diferente organisacion y federacion deportivo. □



Eric S. Lake


Ricky a nace na Lago Hospital y pa algun año a biba na San Nicolas. Ricky ta bin di un famia grandi di 5 ruman homber y 6 ruman muhe. Ricky a bay scol na Jacintha kleuterschool, Pius X, La Salle College



y Scol di Polis y a sigui diferente curso local y internacional den su ramo di trabou. Como bon Dakotero Ricky a y ainda ta haci deporte. El a hunga futbol bou guia di Joe Brown. Deporte cu Ricky a practica na manera recreacional ta: tennis, core bicicleta, esgrima, ping pong, atletiek, landamento y biyar. Ricky tambe ta musico y a toca den drumband di Santa Nero Scout. El a participa na diferente Song Festival organisa pa cuerpo policial y a sali ganado na dos ocasion. Ya pa basta año caba e ta miembro y solista di e koor di pakia di Dakota. Ricky desde año 1976 ta ambtenaar y ta traha na Cuerpo Policial. E ta hefe na Jeugd en Zeden Politie. El a tene na varios ocasion seminario y a duna lectura na y pa hoben. E ta convenci cu door di papia cu mayor y hoben nos por influencia un desaroyo positivo pa cu nos hobennan y automaticamente cu nos pais. Ta e hoben di awe ta nos lidernan di mañan. □

Ricardo Elinio Winklaar

Ricardo Elinio Winklaar miho conoci como Cai of Shon Cai a nace na riba un 18 di Augustus 1921 na Boneiro. Cai Winklaar tabata yiu di e comerciante Libanese Antonio Sassine cu tabata nabega cu su boto entre Venezuela y islanan Antiano importando productonan y fruta. Su mama tabata



Isabel Winklaar y tabata biba na Playa. E la bishita scol Fatima te cu su 14 año y despues mester a bay busca un trabou cual tabata dificil pa haya. Na Januari 1938 cu apenas 17 año e la dicidi di bin biba na Aruba y cuminsa traha di biaha na Lago den e dining hall. Un año despues segundo guera mundial a cuminsa y Cai bligatoriamente mester a bira un solda pa cuida nos costanan di Aruba. E la gusta masha hopi mes di ta un soldaat y tabata masha orguyoso y te cu e la bira un korporaal. E keda den servicio militar pa 5 año durante Guera Mundial. Despues di guera Cai a dicidi di bay traha bek na Lago pero e no kier bay traha den dining hall pero den e refineria mes e biaha aki. Cai tabata gana 60 cen pa ora y despues e la ricibi un aumento di 1 florin pa ora. Cai a traha na Lago te cu año 1965 mientras tanto e la conoce su amiga y despues su casa Alexandrina Kelly (q.e.p.d.). Cai y Ale Winklaar a casa na 1946 y nan a dicidi di bay biba na Brazil y despues na Weg Rooi Hundo, San Nicolaas. Mientras e tabata bin Dakota y tabata tira bista riba un pida tereno y e tabata kier a hay’e pa traha su cas eynan. Despues cu e la haya e tereno e la dicidi di construi un tienda cu a habri na 1958 bou number di “Toko Dakota”. E oportunidad pa cumpra panaderia Muller a presenta na 1965. Awendia Toko Dakota y Panaderia del Pueblo ta propiedad di famia Winklaar. Cai su ultimo proyecto ta e apartmentnan den Guyabastraat cu a ser construi na 1993. Cai Winklaar y famia Winklaar completo semper tabata gran sostenedo di nan bario Dakota. Cai ta masha orguyoso di por ta un Dakotero. □

Ronald E.T. Petronia

Ronnie ta naci na Aruba y ta casa cu Cirila Scharbaay. For di e matrimonio aki a nace 2 yiu homber. Ronnie a sigui scol na St. Dominicus Collega y despues 3de H.B.S. El a traha desde año ’59 pa e compania di su tata. Sr. Yubi Richardson a acere’e pa ayudo cu ekipo pa S.V. Dakota por haci un tereno limpi. Bou di maneho di Sr. Menelio Loeftok el a drenta den management team pa dirigi e seccion di futbol. Durante di periodo di e managemant team aki S.V. Dakota a bira 10 biaha campeon. Sr. Ronnie Petronia alabes tawata representante di S.V. Dakota den A.V.B. y delegado pa reunion di N.A.V.U. El a fungi hopi año como president di Comision di Castigo den A.V.B. Sr. Rufus Mac Williams a ofrece un trabou den departamento di Sociale Zaken como ambtenaar den Loon Technische Dienst. Tambe e tawata shop steward di S.E.P.P.A. den departamento di Labor. For di año 1986 el a fungi como hefe di seccion Loon Technische Dienst. Awor Sr. Ronnie Petronia ta gosa di un pensioen bon mereci. □



Sigui lesa pagina 15

Continuacion di pagina 14

**Marlene Wiersma
Bronswinkel**



Sra. Marlene T. Wiersma-Bronswinkel naci 17-6-1939 Sra. Marlene a hunga softbal pa team di “Jo Margaretha” (+), team di Don Q y baluarte. A hunga posicion di pitcher y tercera base. A forma parti di comite di dama di centro di bario di bario y deporte Dakota bou presidencia di Sr. Nelo Loefstok na aña 1976 y tawata encarga cu buurtwerk. Sra. Marlene ta ama di cas ,ta casa cu Alex Wiersma y tin tres yiu. Su hobby ta: gusta cushina cuminda dushi.□

Zelda Steenen



Zelda a nace den Dakota y te ainda ta biba den Dakota. Como hoben el a hunga bolas crioyas pa e ekipo di Dakota y diferente biaha a hunga den e torneo di bowling pa e bario di Dakota. Durante torneo di Dakota pariba contra Dakota pabou, Zelda tabata asisti como fanatico. Tambe el a traha como boluntario na Centro di Bario y Deporte Dakota como bibliotecaria. Zelda a haci hopi trabou boluntario entre otro pa Falpa, revista Chinchirinchí, Bon Dia Muchanan y tambe tabata y ta miembro di diferente organisacion. Awendia e ta un di e traductornan di e revista E Caminda. Su hobbynan ta bowling, lesa, mira pelicula y scrapping. Despues di a bira maestro Zelda a traha 1 aña den enseñanza regular pa despues dreña den enseñanza special unda te dia di awe e ta traha. Numa awo, e ta cabesante di Scol Paso Pa Futuro. Zelda no a para keto y a sigui capacita su mes. El a logra dos diploma di Papiamento y un di Enseñansa Special. Zelda mes no tin yiu, pero ta considera tur mucha di su bario y scol un poco di dje. Su motto ta: “Mi kier haci un diferencia.”□

Frank Albert Williams

Frank Williams a nace na Tarabana 1 december 1941 y semper a biba na Dakota cu excepcion di 5 aña cu e tawata studia na Hulanda. Frank ta casa y ta tata di dos yiu muhe. El a pasa su infancia den Potrero y despues Dakota. Como hoben el a forma parti di team deportivo di Dakota, specialmente di futbol. Frank a atende scol na Playa. Na 1959 el a bay studia pa maestro di scol na Hulanda. Na 1964 el a bolbe Aruba y a cuminsa traha den enseñanza basico. El a sigui capacita su mes y a logra haya su L.O. y M.O. akte den Ingles. Na 1971 Frank a funda “Avond Mavo Aruba” Tambe el a traha na Departamento di Enseñanza y a finalisa su carera profesional como Inspector

di Mavo. Frank ta tambe traductor huramenta den idioma nan Ingles, Hulandes y Papiamento. Durante su carera profesional el a fungi como miembro di diferente organisacion manera Aruba Jaycees, S.V. Dakota, S.K.A., Teatral Arubano. Den politica Frank tawata miembro di Eilandsraad y miembro di directiva di SKOA. Actualmente Frank ta miembro di directiva di fundacion “Respeta Bida ... simper corda” Frank tin diferente hobby manera skirbi poesia, storia cortico y novela. Tambe el a traduci obra na Papiamento y Ingles. Cu ayudo di Otty Oliveira (q.e.p.d.) Frank a compila y produci e buki historico/ conmemorativo: 50 aña Parokia Dakota. Awor Frank ta un pensionado.□

